




AZHAR

Lambaian Pulau Nangka

- 1,2. BATU karang yang terdapat di perairan Pulau Taman Laut Melaka. Sumber Jabatan Perikanan Negeri Melaka
3. AKTIVITI air di Pulau Nangka. Foto Taman Laut Melaka
4. TUGU yang dibina di Pulau Nangka. Foto Taman Laut Melaka
5. POKOK di Pulau Nangka. Foto Taman Laut Melaka



Liana Sahabudin

AYER KEROH – Majlis Pembangunan Pulau-Pulau Melaka (MPPM) dalam perancangan untuk melantik Jurupandu Alam Semula Jadi di Pulau Nangka sebagai nilai tambah kepada perkhidmatan sedia ada.

Ketua Pegawai Eksekutif MPPM, Azhar Yaacob berkata, Jurupandu Alam Semula Jadi memainkan peranan penting dalam menceritakan tentang sejarah Pulau Nangka kepada pelancong.

Azhar berkata, cadangan itu sudah dipanjangkan kepada Kementerian Pelancongan, Seni dan Budaya (MOTAC) Negeri Melaka.

"Jurupandu ini perlu mendapatkan lesen daripada jabatan terlibat, jika diluluskan kita akan buka tawaran kepada mereka.

"Ini salah satu tarikan untuk pelancong datang ke pulau-pulau di perairan Melaka, selepas ini pelancong tidak hanya terhad kepada aktiviti air seperti 'island hopping' dan snorkeling, tetapi pendedahan mengenai sejarah Pulau Nangka.

"Kita akan bekerjasama dengan Jabatan Perhutanan Negeri Melaka dan Perbadanan Muzium Melaka (Perzim) jika inisiatif ini dilaksanakan nanti," katanya kepada Melaka Hari Ini.

Dalam pada itu, Azhar berkata pihaknya juga dalam usaha untuk memasang tag pada setiap pokok yang ada di Pulau Nangka.

"Pokok ini akan dipasang tag nama komersil dan saintifik termasuk usianya, insya-Allah inisiatif ini juga kita akan laksanakan dalam masa terdekat.

"Sekarang yang kita kenal pasti adalah pokok kelat jambu laut di pulau ini," katanya.